

清客外集

一
函
十
冊
函

史 脈 填 詞

清容外集

皇 貞 齋


紅雪樓藏本

空谷香傳奇自序

海寧姚氏爲南昌令尹顧君瓚園賢姬事令尹十有四載
乾隆庚午冬誕一子甫及晬而姬死時年二十有九予往
弔之令尹瘠而慟同人竊有笑之者令尹獨留予飲總帳
側語姬生平事最詳凡三易燭而令尹色沮聲咽予亦泣
然不能去夫姬以弱女子未嘗學問一絲旣聘能爲令尹
數數死之其志卒不見奪雖烈丈夫可也方欲爲姬作小
傳越日晤方伯王宗之先生語及之先生曰吁姬其可傳
也已天下事有可風者與爲俗儒潦倒傳誦曷若播之愚

賤耳日間尙足觀感勸懲冀裨風教予唯唯旣而兩赴春
官轉徙燕齊間且三載當風霆雨雪空齋兀坐時厯念夙
諾心口間輒汨汨然欲有所吐而究未能踐甲戌乞假還
寒舟孑然行迴颼涸渚中厯碌如旋牀疏櫺四閉一榻自
欹乃度事勢揣聲容譜爲空谷香傳奇凡三十篇日有所
得卽就隙光中縱筆書之脫稿後擊唾壺而歌聲情颯颯
與風濤相蕩激此身若有所憑者同視同舟之客皆唏噓
泣數行下噫嘻姬之貞魂烈性感人遂至如此夫他若刻
畫小人摹寫世態又二十載飄零閱厯所助知我者何罪

焉因念斯世之大飲刃投繯之婦何日無之其埋沒泥塗
骼髑中者安能一一在人耳目間寄百端于茫茫存什一
于千百亦可長歌當哭矣明日歸質方伯或令伶工演習
之未審酒綠燈紅之際令尹當何如觀場者又當何如也
小雪日濟寧舟次鉛山倦客自序



序

文字無關風教者雖炳耀藝林膾炙人口皆爲苟作填詞
其一體也史家傳志之文學士大夫或艱涉獵及播諸管
絃托于優孟轉令天下後世觀場者若古來忠孝賢奸凜
然在目則填詞足資勸懲感發者亦重元人襍劇限于篇
幅故事曲繁白贅節目殊多牽混南曲旣興名作亦鮮琵琶
詞意深摯質樸高華無有倫比雖以幽閨祝髮專工本
色且難追步其他淺俚癡肥者固不足道而妖艷靡曼之
音誨淫倡亂甘以詞章得罪名教遂使毛穎陳元失身溷

厠楚炬秦灰不能廓清摧陷豈非詞場冤山苦海歟或有
迂儒解談忠孝又苦筆陣庸腐麻木不仁而輪困滯拙使
人讀之不快亦恨事也余守越州獲交蒼生太史最稱契
洽太史厯落嶽寄名山友教跌宕于文章氣誼間有不可
一世之槩酒闌燈灺意有所觸輒縱筆取古今事作金元
院本以發揮其志趣此空谷香傳奇其一種也余謂海內
如顧姚之事者不知凡幾不遇蒼生莫傳姓氏今觀三十
首苑結纏綿淋漓透豁意則草蛇灰線文則疊矩重規語
則白日青天聲則晨鐘暮鼓吾不知出于仙佛之炎炎皇

皇耶出于兒女子之喁喁于于淒淒楚楚耶抑出于蒼生
之諄諄懇懇借存提命耶問之蒼生不知也蒼生曰吾甫
擲管時若有不能遏抑者洋洋浩浩奔注筆端乃一決而
出焉吾固不知孰爲仙佛孰爲兒女子而遂成吾空谷香
之三十首矣予曰此有關風教之文也亟授梓氏使讀其
曲者共思其人云辛卯二月燕臺張三禮椿山氏書



題詞

苦海無風日起波鍾情人更折磨多偶然譜八桓伊笛齊
向蒼天喚奈何

才子幽懷寄國香生花筆筆斷人腸空中缺陷何從補不
怨共工怨女皇

飛花縹緲落塵寰薄命難留裊席間千古才人齊一哭傷
心不獨是紅顏

風雅扶輪仗謫仙前生原住大羅天若非一曲猗蘭操空
谷香從何處傳

山陰石顰 劉文蔚

謂他人父走天涯鋤必當門禍有芽地水火風磨鍊出人
天一朶劫中花

生來絕不似紅顏膽識朱家劇孟間慚愧樓前身一死斷
魂三到鬼門關

離魂也有合懽時玉果金錢又洗兒若使永諧官閣裏可
憐天意不如斯

國香國色自相因謫墮何煩歎不辰芳草美人原合并離
騷心事賦靈均

歸安戴永植農南甫

桃李昌丰得意開春風艷冶傍樓臺國香偏受冰霜苦留
得芳名絕可哀

鉛華洗盡見天成一片吹來變羽聲斑管只工兒女語風
流玉茗枉多情

百般磨折在風塵保得無瑕白玉身無限世間獅子吼殷
勤難得護蘭人

熱酒難澆磊塊胸文章空自哭秋風人間節行須傳述合
付周南太史公

又戲題一首

無限淒風苦雨吹投繯飲刃管絃悲生時季路焉知死可
怪工填絕命詞

苧村桑者錢世錫

曾表賢妃片石芳更傳幼婦谷蘭香不圖才子凌雲筆慣
寫人間節烈腸

貽我西江祝嘏詞汪洋如海細如絲無端更讀幽蘭傳眼
淚潛潛不可支

投繯飲刃爲誰來百折剛腸總不同常怪牡丹花下骨精

魂獨愛柳和梅

巾幘綱常事可風
筆花淚染杜鵑紅
偶然讀到詼諧處
天籟噓噓入耳中

河東陳夢說曉巖

史公家世傳金筆
闡得幽微信可徵
一代廬陵風教在
肯教小說沒王凝

詞苑曾推若士湯
南安夢境太荒唐
不傳梅柳傳蘭蕙
壓倒風流玉茗堂

服媚虛占吉夢通
偏多霜雪少春風
國香不向蕭鼓死
爲

仗芳名播管彤

星小何妨月共明倚他才子好聲名十年許傍河陽種莫
恨花開祇半生

陶輪世界剎那過石火風刀可奈何勘破色身原幻假不
生忉利不閻羅

畱得庭堦玉樹姿春來雨露漸華滋殷勤說與當門客好
爲仙家護一枝

武康高文照東井

意蕊情絲細品量青衣節俠有餘香頭廳閤袖三長手却

與娥眉作主張

貝齒東方善滑稽深文慣借判花題
衣冠魑魅千般態牛渚愁逢照水犀

蒼蘊林中並命禽升天八地准須尋
如何後死南柯守愛聽枇杷水上音

僊緣鬼趣兩模糊倩女魂從筆底呼
他日蓉城公是主不應官籍註酆都

山陰平聖臺確齋

題詞

清容自題

樂水南流折不同此心當日亦堪哀
一絲紅線三生石不信千金換得來

兩度輕離倩女魂笑談惟覺此身尊
不知轉徙朱門妾舞扇歌裙幾輩存

桃李無言亦自芳當門紉佩漫商量
秋來縱被西風敗終向花叢號國香

憐他香令悼亡詩疊在空箱淚點滋
不道五年成往復有人偷譜斷腸詞